

查他山年譜
厲樊榭年譜

全全



直
也
山

年
曾
一
齋

嘉	南
業	林
堂	劉
刊	氏

初白先生年譜序

吳騫

查初白先生年譜一卷予友陳君奉峩手輯奉峩爲先生外曾孫母查孺人先生弟某女孫也夙通書史熟諳家世舊聞奉峩幼孤稟慈氏之教以有成居恆耳目濡染斷蔥截髮之餘側聞緒論輒謹識之積以歲月而成是書故於先生出處事跡皆信而有徵無少文飾先生學博而志宏少年足跡半宇內於書無所不窺卓然爲當世儒宗所著周易玩辭集解及敬業堂全集並錄入欽定四庫全書而詩學尤爲海內談詩家首屈一指長洲沈文慤公輯別裁集亦極推許近武進趙雲松觀察撰十家詩話國朝惟推梅村敬業二家且謂先生

直可繼香山劔南之後二公非如世之徒徇鄉曲之見者蓋天下之公言也古之人誦其詩必論其世此年譜之所由興香山年譜有陳伯玉及汪立名本傳世放翁年譜則雲松著之而錢竹汀宮詹亦著之獨先生未年年譜不無闕典顧從來作年譜之弊繁者每失於蕪簡者又嫌於漏奉我是書攷核詳審而紀載謹嚴可謂簡而有要不蔓不支旣以慰北堂之思又可爲讀敬業詩者得知人論世之概其與陳汪錢趙諸公書並垂不朽無疑也是爲序

從愚谷文
續集錄出

翰林院編修查先生行狀

彌甥 沈廷芳 撰

先生查氏諱慎行字悔餘初名嗣璉字夏重年四十始更焉查氏海寧望族六世祖秉彝明嘉靖進士官給事中以劾嚴嵩父子廷杖謫邊終順天府府尹事載明史高祖志文明廬州府同知會祖允揆明贈武庫司主事祖大緯明武庫司主事 皇贈禮部侍郎父崧繼明縣學生 皇贈禮部侍郎自武庫以下三世皆負才未顯于時先生爲贈公長子幼不令習科舉業故得肆力於經史百家從黃徵君宗羲游長行四方至金陵作爲歌詩傳詠人口同邑楊侍郎雍建開府貴州入幕府時吳

三桂餘孽未殄豺虎塞途決機命將轉戰崖箐閒凡兵
謀先生多與焉歷三載貴州平欲論功以聞于朝固
辭乃之京師公卿大夫咸以國士禮之嘗過齊魯梁宋
渡彭蠡登匡廬之巔所至聲望益起更溯大江造田閒
錢先生秉鐙講論以是詩日富而益奇康熙三十二年
舉順天鄉試越九年方赴公車

聖祖詔選耆儒備顧問用享執薦召入南書房

恩遇特重明年成進士故事庶吉士教習三年散館始
授職先生入館甫四月特除編修扈從塞外者三凡歲
時風土人物悉紀以詩每經進輒稱善一日天寒雨雪
先生方戴白題偕諸臣侍左右

上顧之笑曰查某風度爾雅洵堪爲儒臣冠卽撤
御饌以賜恩賚有加尋兼武英殿修書總裁直廬同僚
各任采集而先生董其成平生恬退重名節有在事者
待同僚以非禮先生起爭之其人將搆衅焉遂告歸羣
公留之不可饋之贐弗受旣歸里杜門著述而山水之
興未衰復南游閩粵久之始歸後以其弟禮部侍郎嗣
庭獲罪牽連被逮同產弟姪並謫戍

世宗因籍嗣庭家得先生詩集覽其紀恩諸作謂侍臣
曰查某忠愛拳拳固一飯不忘君也乃獨見原暨其子
克念放歸田里先生感

國恩痛家難歸卽臥病以雍正五年八月三十日卒年

七十八卒之日橐無新衣囊無餘儲惟手勘書萬卷而已先生品詣矯然學問困灑文章麗則而尤工於詩匯韓白蘇陸之長以發摛性靈海內咸宗之所著有敬業堂集四十八卷已行於世周易玩辭集解十卷蘇詩補注五十卷夫人同邑徵君陸嘉淑女子三人克建丁丑進士鳳翔府知府克承國子生皆先先生卒克念甲辰舉人孫恂昌祈昌禧岐昌昌禔皆世其家學先生宏獎後進多成名士廷芳愧無學而承提誨十餘載規爲聲效聞見頗悉旣請於方子銘其墓而其厯官行事之概有未備者謹撰次如右獻諸史館謹狀

翰林院他山查公墓誌銘

桐城 方 苞 纂

君諱嗣璉字夏重號他山後更名慎行字悔餘浙江海寧人也余始入京師查氏負才名者數人而君尤獲重名朋齒中以詩名者皆若爲君屈焉君少時聞吾邑錢先生飲光深於詩卽沂江繫舟樅陽造田閒講問逾時而歸錢先生時爲道之及與交久長見其於時賢中若自矜異然猶以詩人目之及余脫刑部籍

聖祖仁皇帝召入南書房中貴人氣燄赫然者朝夕至必命事專及於余乃敢應唯敬對外此不交一言又畏風歛常著緇布小冠諸內侍多竊笑或曰往時查翰林

慎行質性頗類此而冠飾亦同噀異哉余用是益有意於君之爲人而君尋告歸及篤老以其弟嗣庭獲罪牽連被逮同產弟姪並謫戍而君獨見原蓋

先帝無幽不燭君恬淡寡營久信於士大夫故在事者愍焉而以情達也君既歿其子克念以狀請銘數年矣乾隆元年十有二月余臥病直廬或告曰君之彌甥沈庶常廷芳屬爲通言速君銘且告克念之喪是夜夢與君問勞如平生晨起命家人檢故狀不得乃就所獨知於君者以誌焉覽者卽是以求之其所狀事蹟不具可也其詩已行於世者凡四千六百餘篇各以時地次爲五十四集君生於順治七年庚寅五月初七日酉時卒

於雍正五年丁未八月三十日辰時年七十八歲查爲
海寧望族父崧繼改名遺字逸遠爲浙西耆舊得贈如
君官母鍾氏兄弟四人三成進士娶陸氏子三人克建
康熙丁丑進士陝西鳳翔知府克承國子生俱先君卒
克念甲辰舉人以某年某月某日葬於某鄉某原銘曰
所向所斲詎止於斯而終已無施惟以弻于詩

查他山先生年譜

嘉業堂叢書

外曾孫陳敬璋撰集

先生諱慎行字悔餘浙江海寧人初名嗣璉字夏重後更今名號他山又號查田晚築初白菴以居學者稱初白先生

六世祖秉彝字性甫號近川明嘉靖戊戌進士官戶科給事中以疏劾權相杖謫後起官刑部主事歷順天府尹有覺菴稿

事詳海寧州志名宦傳

高祖志文字鳴周號岐峰明隆慶丁卯應天舉人官廬州府同知管無爲州事加四品俸誥授奉政大夫曾祖允揆字舜佐號斗南明邑諸生

祖大緯字公度號蘧菴明崇禎癸酉順天副榜官兵部
武庫司主事以孫官貴 贈通議大夫

查氏族譜約編蘧菴公負才名有膽略遇大事可咄
嗟立辦

父崧繼字柱浮更名遺字逸遠號學圃明邑諸生以子

官貴

贈通議大夫內閣學士兼禮部侍郎

事詳州志隱逸

傳母鍾氏名蘊字眉令仁和人明河南巡撫鍾忠惠

公化民女孫司理公名臣女累

贈孺人晉

贈淑

人

黃宗羲誌墓逸遠為諸生卽忼慨有志喜讀史得其
大意以經濟自期許雖鬱鬱無所施為而溝渠保甲

社倉諸法講求通變未嘗不行之一方也逸遠短小
精悍久處囊中人亦謂其英銳之氣當伸之於歲月
不得於彼者必得於此乃一旦禾郡歸卒於舟中屈
伸之數有不可解者年五十三子四人皆有俊才逸
遠不令爲科舉干祿之學而讀書爲詩古文士林望
風推服天之伸逸遠者其在茲乎

族譜約編逸遠有文名工書翰不求聞達祖業銷落
胸次浩然蓋知其後之必昌也

選佛詩傳太淑人熟精文選工詩古文詞著長繡樓
集百卷疾亟時自以風雅流傳非女子所宜悉焚棄
之伯祖初白老人默識追錄詩詞六十餘首題曰梅

花園存稿 敬璋案是稿為家母所得珍藏篋衍璋謹錄副本免牀吳丈為刊入海昌麗則行世

國朝

世祖章皇帝順治七年庚寅五月七日酉時先生生於
海寧花谿龍尾山故里

八年辛卯先生年二歲

九年壬辰先生年三歲

春二月二十九日午時仲弟嗣琛生 字德尹一字

朗山號查浦又號晚晴軒主人少先生二歲與先生
情好尤篤終身無閒言無忤色

族譜約編德尹亦有異資詩名與兄相埒壘篋唱和
一時稱為盛事兼工書翰健談論鋪陳終始聽者忘

卷

十年癸巳先生年四歲

十一年甲午先生年五歲

始入小學 先生天資穎悟母太淑人課之讀授唐人詩數百篇卽解切韻諧聲大義

十二年乙未先生年六歲

通聲韻工屬對 太淑人勤紡績先生侍旁誦讀命屬對曰伊軋布機聲先生應聲曰玎璫玉佩響太淑人奇之

十三年丙申先生年七歲

十四年丁酉先生年八歲

受學於家庭 時逸遠公宴客卓偶敬侍者以物墊
之公命卽事爲破題先生對曰平所不平則各得其
平矣客驚異稱賞

十五年戊戌先生年九歲

十六年己亥先生年十歲

作武侯論 反覆數百言邑先輩范默菴見之歎曰
援經證史論斷精卓曠世才也

十七年庚子先生年十一

十八年辛丑先生年十二

聖祖仁皇帝康熙元年壬寅先生年十三

二年癸卯先生年十四

三年甲辰先生年十五

春正月二十一日子時叔弟嗣庭生 字潤木號橫

浦

四年乙巳先生年十六

冬季弟謹生 字濬安號信菴出爲叔父眉石公後

眉石公名眉繼逸遠公同母弟也有文名而早世生子叔寶公嗣珪亦能文而天逸遠公痛兩世廢居煢煢無依而本宗無應繼子乃以濬安爲兄叔寶後奉眉石公爲祖權也逮先生旣生次子逸遠公命名克承曰此兒稍長出爲汝兄嗣珪後以承宗祀世系不可紊也後二十年先生集宗郈曰叔母葛太君撫吾

弟自幼迄成人恩勤備至義難復歸大宗然倫序不可不正據禮緣情應以弟繼叔氏爲小宗而以弟所生子代承兄祀吾不忍仰遵成命分所有以利吾子也宗議遂定是時叔母葛太君尙在堂告廟之日破涕一笑曰五十年飲泣嫠婦今喜有子有孫矣蓋先生公正居心不苟徇利以傷義類如此

五年丙午先生年十七

六年丁未先生年十八

春正月陸安人來歸 安人爲辛齋徵君弟三女少先生一歲先是逸遠公與徵君同里同志故徵君遂以安人字先生締姻時猶在襁褓中至是始來歸合

卷之夕徵君手書致逸遠公曰練裳竹筥牽犬繫羊
弟并無之所恃知我耳兩翁情好脫略殆如此

七年戊申先生年十九

夏四月二十二日長子克建生
字用民號求雲

讀書武林吳山從慈谿葉伯寅先生學 逸遠公初

不令習舉業至是始為櫟括之文

巖門詩話大父嘗舉先太淑人詩示予兄弟曰才

名終世態學業有家傳此吾讀書棲水時曾祖母

寄示之句願汝曹亦毋忘斯訓也

敬璋案據太淑
人示兩兒讀書

吳山詩當係順
治十六年己亥

八年己酉先生年二十

九年庚戌先生年二十一

十年辛亥先生年二十二

應童子試 先生受知於郡守淮南嵇公未及終試而太淑人疾篤遂輟筆硯專心侍奉延醫師饋湯藥寒暑晝夜不遑寢食者几十閱月

十一年壬子先生年二十三

春三月丁太淑人憂

夏五月奉逸遠公命與仲弟析箸 時新舉大喪饗殮或不給先生督率老婢子鋤中庭隙地種茄續食陸安人亦課蠶桑勤紡織以佐不逮

十二年癸丑先生年二十四

十三年甲寅先生年二十五

夏六月先生服闋

十四年乙卯先生年二十六

十五年丙辰先生年二十七

十六年丁巳先生年二十八

秋九月九日次子克承生 字坤元號寄邨國子生

工詩文兼書畫

十七年戊午先生年二十九

春三月一日丁逸遠公憂

十八年己未先生年三十

以下慎旃集第一敬璋案詩集編年自此始蓋先生編己

未以前詩古文稿悉燬去不欲以少作傳世故斷自己未始

夏至荊州入以齋楊公幕 楊公名雍建先生同邑

人以副憲出撫貴州招先生入幕時吳三桂餘孽未
殄警急烽煙聞者心悸先生浩然長往絕無難色同
人莫不壯其行焉

十九年庚申先生年三十一

春客楚中

夏自辰州至黔陽 先生性耿介非義之財不妄取
卽過分之施亦卻而不受時調遣徵發羽檄旁午如
便宜除授搜捕僞職二事賄賂大行先生皆峻拒之
楊公諗知之益加敬禮事無大小皆諮議而行然納
降僞官情有可原者必力爲之請所全甚眾

六月服闋

二十年辛酉先生年三十二

在黔陽

夏謁王陽明書院

二十一年壬戌先生年三十三

五月以後為
遄歸集弟二

秋歸自黔陽 先生聞仲弟北游遂束裝而歸與季

弟同居里中

從姚江黃梨洲先生學

敬璋案據州志寓賢傳黃
公至海寧在康熙丙辰

黃公名宗義餘姚人山陰劉念臺先生弟子著述等
身力辭徵聘海內推為東南遺逸之冠嘗至海寧邑
侯許公三禮戒邑中人士胥會於北寺聽其講學先
生往從之游自是深得體要工夫博極子史約歸一

致

張子游遠為作槐陰抱膝圖

二十二年癸亥先生年三十四
十月以後為西江集弟三

夏游吳門

冬十月赴西江入族父廉訪幕 廉訪公名培繼字

至望順治壬辰進士由兵科給事中出巡江西饒九

南道副使時攝臬篆邀先生至幕中

二十三年甲子先生年三十五
四月以後為踰淮集弟四

春三月歸自西江

夏四月入都游太學

秋闈下第

二十四年乙丑先生年三十六

以下為假館集弟五

在都中 先生秋闈被放將出都適中丞楊公內擢

少司馬留先生邸舍

秋夜集朱竹垞先生古藤書屋

二十五年丙寅先生年三十七

十一月以後為人海集弟六

在都中

冬館相國明公家 時楊公以乞假養親出都相國

明公珠延至私第下榻自怡園令其子愷功揆敘受業焉有欲致殷勤於相國賂先生為先容者先生正色曰吾師也豈以此自汙耶其人愧謝而去

著人海記 凡四卷雜記都中事皆得之聞見者

二十六年丁卯先生年三十八

在都中仍館相國明公家

秋闈復下第

二十七年戊辰先生年三十九

二月以後為春帆集第七

春二月出都 外舅陸辛齋先生客都門忽抱危疾

先生為買舟扶持南還周旋湯藥奉事惟謹有為人

所難者

夏抵家

作蘆塘放鴨圖

二十八年己巳先生年四十

獨吟集第八 十月以後為竿木集第九

春二月哭外舅陸辛齋先生 歿後三十年未葬先

生爲之經營合藏志壙焉

復入都

夏集竹垞先生槐樹斜街寓

二十九年庚午先生年四十一

二月後爲題壁集弟十一
入秋爲橘社集弟十一

春二月出都 先生以飲酒獲罪與趙秋谷宮坊執

信同被吏議時大司寇寇玉峰徐公 予告南歸仍領

書局出都邀先生及姜西溟宸英偕行

秋在橘社書局 橘社在洞庭東山之麓劉氏取以

名園徐公於此假設書局先生與焉

冬自書局歸

三十年辛未先生年四十二

勸酌集
弟十二

家居

春幼子克念生 字維聖號雙峰

二月長孫恂生克建出 字其武號勤補國子生考

授縣尹

三十一年壬申先生年四十三 湓城集弟十三 霧窟集弟十四 又雲

以後為客船 集弟十五

春客九江太守恆齋朱公儼幕 先是庚午春朱公

由刑部郎出守九江貽書見招至是始往踐約

輯廬山志 凡八卷又為廬山紀游一卷

秋游匡廬

九月歸自九江

三十二年癸酉先生年四十四 並繼集弟十六

春入都復下榻自怡園

秋舉順天鄉試 時先生長子克建亦捷南闈

三十三年甲戌先生年四十五 三月以後為白蘋集弟十七 七月以後為秋

鳴集弟十八 十二月以後為傲裘集弟十九

春出都 時以禮闈報罷出都座主侍讀青谿徐公

亦將南歸買舟通潞招先生同行

秋游越州

冬復入都 揆侍講愷功馳書見招遂北行

三十四年乙亥先生年四十六 酒人集弟二十 七月以後為游梁集弟二十一

在都中

春二月孫昌祈生克建出 字度昭海寧諸生

秋游汴梁 同學許霜巖北炎赴陳留縣令任招先生同往於是涉滹沱循太行東麓歷趙衛梁宋之郊吟眺始徧

冬還家

三十五年丙子先生年四十七

晚上集第二十二 五
月以後爲中江集第二

三十

春客皖城 應青谿徐公之招也與其孫任可偕往由四安鎮取山路經宣城池陽抵黃湓口始渡江皆向來游蹟所未到也

夏自皖上至九江復客太守朱公幕

冬由九江入都

三十六年丁丑先生年四十八

得樹樓集弟二十四

春出都 時長子克建捷南宮先生仍下第遂挈之

還家

夏築得樹樓著雜鈔 積之得二十卷

三十七年戊寅先生年四十九

近游集弟二十五雲集弟二十六

五月賓

以後為炎天冰雪集弟二十七七月以後為垂橐集弟二十八

春至禾中復游苕上

夏偕竹垞之閩中及秋而還

三十八年己卯先生年五十

杖家集弟二十九

家居

秋仲弟德尹舉鄉試

冬十月二十五日陸安人卒 安人體素羸弱善病
至是漸劇聞先生將出游則掩衾而泣先生憐之然
固心知爲不祥蓋先生頻年往來萬里安人從無離
別可憐之色也卒年四十有九安人善事舅姑曲盡
婦道食貧茹苦一以勤儉佐其不及絕無幾微愠先
生心感之歿後垂三十年不置一婢恩義兼盡尤爲
人所難

冬十一月入都

三十九年庚辰先生年五十一

過夏集
第三十

在都中 仲弟聯捷成進士授翰林院庶吉士先生

復下第族兄編修荊州公嗣韓留之下榻寓齋

秋七月出都

九月次女歸于朱 為恆齋太守子婦

冬復入都

四十年辛巳先生年五十二

偷存集第三十一 五月以後為繙經集第三十二

春屬禹司賓之鼎作初白菴圖 取東坡身行萬里

半天下僧臥一菴初白頭詩意也

夏四月出都

四十一年壬午先生年五十三

十月以後為赴召集弟三十三

春游湖上

蘇詩補注成 凡五十卷先生性好蘇詩素不滿王

氏注謂其疏漏固多繁蕪復不少有改竄經史妄託志傳以傳會詩詞者有與他集互見反割截他集半首誤爲全篇者甚且唐人詩亦有闕入者爲之駁正瑕璽零丁件繫積久成卷復購得施氏元注與吳中新刻多所異同遂審定年表搜輯逸詩自癸丑迄壬午歷三十年始成是書

欽定四庫全書總目初宋犖刻施注蘇詩急遽成書頗傷潦草又舊本徽黯字迹多難辨識邵長蘅等憚於尋繹往往臆改其文或竟刪除以滅迹併存者亦失其真慎行是編凡長蘅所竄亂者並勘驗元書一一釐正又於施注所未及者悉蒐采諸書以補之其間

編年錯亂及以他詩濶入者悉攷訂重編凡爲正集四十五卷又補錄帖子青詞致語口號一卷遺詩補編二卷他集互見詩二卷別以年譜冠前而以同時倡和散附各詩之後雖卷帙浩博不免牴牾其譌漏之處爲近時馮應榴合注本所校補者亦復不少然攷核地理訂正年月引據時事元元本本無不具有條理非惟邵注新本所不及卽施注原本亦出其下現行蘇詩之注以此本居最區區小失固不足爲累矣

夏赴保定 先生長子克建以進士謁選得直隸東鹿縣令迎先生就養署中

冬十月蒙

恩詔赴行在 是歲恭遇

南巡回鑾駐蹕德州特以先生姓名問相國京江張公

玉書

時安谿李公

光地

巡撫畿甸同在

行殿以學問人品奏對訖十七日旋奉

召見之旨李公傳帖下縣先生卽由東鹿馳赴

行在

召對良久隨

賜御書程子視箴楷字一幅

二十八日

召試南書房

與長洲韓元少葵同試唯仁人爲能愛

人能惡人制藝一篇再試士先器識而後文藝論一首遂奉

旨查慎行汪灝著同查昇每日進

南書房辦事先是

內廷皆詞臣輪班入直專命之榮蓋自此始

四十二年癸未先生年五十四五月以後為隨輦集弟三十四

春入直 南書房

三月捷南宮 座主為相國孝感熊公賜履 大宗伯

許公汝霖

夏四月 殿廷對策成進士 先生名在二甲第二

十五日 保和殿引見

欽授翰林院庶吉士特免教習二十日

文廟釋褐二十一日赴

暢春園謝

恩

五月隨

駕幸口外避暑山莊 先十日傳

旨南書房翰林七人俱著隨行七人者諭德查昇編修
陳壯履勵廷儀錢名世庶吉士汪灝蔣廷錫及先生
也將行患腹疾蒙

恩賜西洋上藥復遣內侍傳示

御札云調飲食最爲緊要醫書有云非濕熱不作瀉非

停食不作痛又云通則不痛痛則不通人皆知其調理至飲食之時則不能矣 先是

上幸南海子捕魚賜羣臣先生賦謝

恩詩有云笠簷蓑袂平生夢臣本煙波一釣徒詞意稱旨一日忽奉

旨傳煙波釣徒查翰林進見一時以爲嘉話自是每御試詩古文詞

上親定甲乙輒以先生爲第一仰和聖製未有不稱

旨有作呈

覽未嘗不

稱善也

六月奉

旨編輯歷代詠物詩

二十日

召對行殿 先生已出至直廬復

命內侍傳

諭云汝子在東鹿縣居官甚清朕已稔知

秋自口外還都中

著陪獵筆記 凡三卷

四十三年甲申先生年五十五

直廬集弟
三十五

春入直 內廷 寓城南道院

奉

旨分輯佩文韻府

冬十一月奉

旨特授編修 故事庶吉士教習三年散館始授職先
生入館四月卽除編修其

恩遇爲特重焉

四十四年乙酉先生年五十六

夏五月扈

駕幸古北口 先是四月先期引見各省試差例由本
院開送吏部先生啟奏云臣身依

禁近且現在隨

駕之列不願作鄉試主考奉

溫旨云汝所見極是以後遂為定例

六月蒙

恩賜御書敬業堂扁額及

御書對聯 句云硯寒金井水簷動玉壺冰

秋叔弟潤木舉鄉試亞魁

四十五年丙戌先生年五十七

五月以後為甘雨集弟
三十七 十月以後為

西阡集弟
三十八

春叔弟成進士授翰林院庶吉士

五月復扈

駕至古北口 一日秋至塞外天寒雨雪先生方戴青

氈大帽偕諸臣侍左右

上顧之大笑曰查某風度爾雅洵堪爲儒臣冠撤

御饌以賜恩賚有加自後一日常五拜賜侍宴賜坐嘗
命中使勸飲

秋八月

皇太子睿賜初白菴扁額

九月乞假葬親奉

俞旨不必停俸 先生性至孝己未以後游學四方暫
歸省視未嘗不詣兩親柩前號呼飲恨旣登仕籍俸
入僅供薪水是年蒙

恩賜白金二百兩卽寄與仲弟規計葬地一區至八月

隨

幸至烏城旅舍接家信知得吉壤於龍山西麓便欲乞假同列咸勸止之曰

君恩方重且俟後期先生曰吾老矣

皇上以孝治天下不於此時銜土安葬是

君親兩負矣

回鑾之日力奏得請遂星夜遄歸經營窀穸

冬葬逸遠公暨鍾太君於龍山西阡 先生與兩弟

德尹濬安焚黃祭告哀感行路自是每遇先世忌辰

致齋設奠不與讌會 新阡羅城後向有徑通世戚

家墓門堪輿者指爲本穴龍身宜靜不宜動議樹松

楸以護之闢路於植木之外世戚恃強毀樹開溝計
刑地脈戚友皆不平欲直於官先生憮然曰傷戚誼
構世怨非所以寧吾親也乃築牆爲界以息爭端後
其家感悔謝過先生終不與相見 先生外王母羅
太君太淑人生母也歿後無子權厝仁和縣北陸邨
太淑人疾亟時遺命同歸一域先生志之不敢忘西
阡規制甫畢卽移葬新壟之西北隅春秋省墓享祀
必先之且恐後世忘所自出也立碑置產俾子孫致
告勿替云

四十六年丁亥先生年五十八

迎鑿集弟
三十九

春渡江迎

鑾 恭遇

仁皇帝閱河南巡先生買舟渡江迎

駕請安畢

上命移傍

御舟遂扈 蹕而南自淮揚抵江寧達杭州

夏五月至高郵送

駕復請展假 先生送至邵伯埭因葬事未竣跪請展

假

上點首云知道了即從這裏回去罷

四十七年戊子先生年五十九

還朝集第四十 五月
後爲道院集第四十一

春入都 先生家居一年展限已滿州縣敦迫就道

一術士語先生曰君欲賦遂初其在壬癸之交乎先生笑而頷之

三月重直 暢春園 暢春園向未有直廬自癸未

正月先生與汪紫滄及族子昇始奉

召入直後遂爲例

冬十一月奉

旨暫停入直

四十八年己丑先生年六十

槐篠集弟四十二

春二月復直 內廷

夏四月奉

旨赴武英書局分纂佩文韻府 二十四日

上諭云汝學問好可赴武英殿督纂韻府先生受命後卽偕錢亮功汪紫滄兩同年竭力蒐采每卷帙排日進呈一字一句俱依

旨定奪

四十九年庚寅先生年六十一

八月以後爲棗東集第四十三

秋移寓棗東書屋

五十年辛卯先生年六十二

在武英書局 時同官某爲殿中總監所侮先生從旁呵斥之其人憚先生正直無以難也

冬得風疾

孫昌禧生克承出 字開祖號花南邑增生

五十一年壬辰先生年六十三長告集弟四十四

春因病乞假 先生於上年臘月左手患風今春漸及右臂奏請停免內直始得乞假前後已滿百日病猶未除奉

旨在京調理仍赴翰林院供職

秋九月六日孫岐昌生克念出 字藥師號巖門邑

諸生工詩

五十二年癸巳先生年六十四待放集弟四十五 七月以後為計日集弟四

六十

在翰林院

秋七月乞休歸里 先生素甘恬退宮坊員缺必引

分求免開列時適有在事者待同僚以非禮先生起
爭之其人將搆釁焉先生遂引疾告歸羣公留之不
可將行文端公揆敘具千金爲贈且致辭曰先生初
白菴未成期以此規爲之先生感其情重手取百金
曰舟車乏費藉此爲治裝計至圖中光景久已夢想
置之今得歸丙舍以畢餘生志願足矣使者往返再
三卒不納

仲弟德尹由編修陞侍講

叔弟潤木子克紹舉順天鄉試

五十三年甲午先生年六十五

齒會集弟
四十七

居里中

春三月宗伯許公招爲娛老會於破石鎮同會者楊宮贊晚研中訥陳侍御棣谿勳與先生凡四人

秋族兄季方城招爲五老會於西林菴同會者族兄

觀延

嗣鑑

曾三

人耀

芝田

璫

兩弟

與先生凡五人

族譜約編自他山兄以友愛聞棣萼聯芳一門白爲師友濟濟如也雖經衰落其風尙有存者庭前有老桂色本白每遇秋闈有發者白輒變爲丹人以爲花瑞云

季弟濬安舉鄉試

登秦駐山

游吳門

冬續舉真率會 先生與同宗兄弟勸酬齒序杖履
肩隨較農桑量晴雨閒與田父野老詠歌 盛世且
舉家課集子弟之能文者試之有志者期以上進自
棄者勉其改行

五十四年乙未先生年六十六步陳集弟四十八 八月以後爲吾過集弟四

九十

春游閩中

夏自閩中還西江

四月九日長子克建歿於都門官署 克建字用民
號求雯少有文名康熙癸酉與先生同舉鄉試丁丑
成進士授東鹿令有廉能聲邑民感之至今廟祀弗

替內擢戶刑二部主事歷官郎中出知陝西鳳翔府
命下甫一月未之任卒於京邸年四十有八

秋九月孫昌禔生克承出 字含章

冬宗伯許公復招爲五老會 同會者楊晚研陳宋
齋許梅谿與先生凡五人

五十五年丙申先生年六十七

五月以後爲夏
課集弟五十

居里中 先生性嚴肅燕居儼若朝典待弟子嚴而
有恩有過雖成人不少貸與人交雖後輩必成禮而
退不衣冠不見也

五十六年丁酉先生年六十八

望歲集弟五十一
月以後爲粵游集弟五

二十

居里中

冬十月赴粵東

應中丞佟陶菴

法海

之招也

五十七年戊戌先生年六十九

正集編年止此五月以後為漫興集弟五十三

夏四月由粵西旋里

五十八年己亥先生年七十

秋赴西江入南昌書局

白近薇中丞先生故人也

延修江西通志往焉

五十九年庚子先生年七十一

在南昌書局

春游廬山

江西通志成

凡一百七十卷又輯廬山志八卷鷺

湖書院志二卷

冬歸自西江

六十年辛丑先生年七十二

居里中 先生自癸巳長告後依棲丙舍一切世故
不與聞至關祖宗祠墓事則存貯公產嫌怨不避經
理出入勞苦不辭贖祭田修祠宇家雖貧必竭力捐
助恆比豐厚者倍之有時獨力舉行雖困甚弗顧也
嘗訓示子孫曰一官半職皆祖宗功德之報寸土尺
椽皆祖宗福澤所貽追遠不誠未見能長保富貴也
曾孫奕麟生孫恂出 字師九國子生

六十一年壬寅先生年七十三

居里中 先生退休橫谿之上所居室曰窳軒貯書
萬卷坐臥其中記事纂言惟日不足殆不知老之將
至云

世宗憲皇帝雍正元年癸卯先生年七十四

餘生集弟
五十四

居里中

叔弟潤木由編修陞學士兼禮部侍郎

二年甲辰先生年七十五

春三月周易玩辭集解成 凡十卷先生於書無不
讀而最深於經於經無不窮而尤精於易晚年專嗜
易理謂聖人非因河圖以作易仰觀天俯察地近取
身遠取物於是始畫八卦夫子固明言之矣窮卦變

之說疏闢序卦說卦之義推中爻互體之備推八卦相錯之象攷圖圖方圖順逆加減之法極深研幾寢食俱廢皆體驗先儒諸說以折衷於聖人於程傳本義互有發明凡五易稿而後成

訪佟陶菴於江寧試院

秋招諸弟爲真率會

幼子克念及叔弟潤木子克上同舉鄉試

作四杖圖 沈松年作也

三年乙巳先生年七十六

居里中 先生通籍十年歸仍布素家居足迹不入城市當事或以公事造廬徑往報謁竭誠以告時制

軍滿公保撫軍佟公法海皆山水舊游主人及莅吾

浙先生引嫌退避不敢輕懷一刺即遣使存問亦不

緘書報謝懼人疑以私干也

四年丙午先生年七十七十一月以後為詣獄集弟五十五

居里中

春三月作敬業堂銘 先生集黃文節公齋銘語作

敬業堂銘以示子孫其詞曰學未竟日西入明追今

終弗及慢游者日失一日敬業者不速而疾

冬十月曾孫奕會生昌祈出 字涉三

十一月被逮入都詣刑部獄 叔弟潤木由學士擢

少宗伯坐訕謗罪削職逮問先生以家長失教牽連

入獄

族譜約編潤木讀書不多領悟最捷有文名由編修
視學河南以清廉大獲聲望為人跌宕不羈卒自罹
於法

五年丁未先生年七十八

五月以後為生還集弟五十六
七月以後為住劫集弟

五十七

春在獄

三月二十二日弟潤木有罪自殺作詩哭之 時橫

浦公與第三子中翰克上同卒獄中中翰婦浦孺人
與其姑史夫人在家聞變俱投繯而死一時哀感行

路

夏五月奉 赦出獄南還。是案罪名越半年始定。生者俱邀寬典減等發遣信菴以出繼獲免。

世宗覽先生詩集至紀 恩諸作顧謂侍臣曰查某忠愛惓惓固一飯不忘君也乃獨見原先生及其幼子克念俱蒙

恩放歸田里先生感激涕零諭家人曰

聖恩高厚涓埃難報幸不虧體辱親全而歸之死無憾矣

秋八月三十日辰時先生卒 先生自遭家難鬱鬱不樂雖荷

國恩寬宥而骨肉播遷門祚零落怛焉傷悼觸暑南還

中途疾作七月抵家後卽患脾泄神氣衰耗踰月病
漸劇先是出都時向同邑至戚稱貸以行旣歸謀所
以償之易簣前二日售玩器得數十金力疾手緘致
謝時稜藥乏資孫岐昌以後期爲請先生正色曰我
自反生平無一事負人脫有不幸爾輩焉能如期踐
約耶及卒之日櫛無新衣囊無餘儲惟手勘書萬卷
而已

余識太史公年譜旣成客有告者曰敬業詩集編年
次第秩然太史公一生出處事蹟略具何復有年譜
之作耶余應之曰公之出處固莫詳於詩矣而其志
節炳然足以垂示後人爲不朽之典刑者烏可以不
傳也況詩集編年自己未始則己未以前自少及壯
尤不得不先論世乃爲攷其行實采其軼事詳著於
篇而以全集之名繫於每年之下誠恐學識蕪陋多
所挂遺而公之出處大略展卷犁然或亦讀公集者
之一助云乙丑長至日謹書於硤石紫薇山房

查他山先生年譜一卷外曾孫陳敬璋撰他山先生入
國史文苑傳少受學黃梨洲於經邃於易然所長尤
在詩方爲諸生游覽牂牁夜郎之境齊魯燕趙梁宋之
區過洞庭涉彭蠡登匡廬峰訪武夷九曲之勝所得一
託於吟詠故篇什最富康熙三十二年順天舉人其未
通籍卽名聞禁中四十一年 聖祖東巡京江張公安
谿李公隨扈以人品學問薦召對卽入直南書房次年
捷南宮點庶吉士四月授職編修以舉人值南齋不待
散館授職均異數也時族子昇以諭德同值內齋宮監
特呼老查以別之 上幸海子捕魚賜羣臣命賦詩他
山有云笠簷蓑袂平生夢臣本煙波一釣徒俄宮監傳

呼煙波釣徒查翰林時以比春城寒食韓翃傳爲佳話
四十五年乞假還山遂不復出優游林下嘯歌自適遭
弟嗣庭案株繫闔門就逮罪且不測 世宗素識其端
謹特原之放歸田里遂卒他山之詩黃梨洲比之陸放
翁王漁洋則謂奇創之才他山遜陸綿至之思陸遜他
山時以爲知言趙甌北十家詩話舉唐之李杜韓白宋
之蘇陸金之遺山明之青丘 本朝則梅邨與先生可
謂推重之至然列於諸君之後無媿色也此譜之撰在
先生身後數十年然先生以孝廉入直史傳以爲陳澤
州相國薦此譜則云由張京江李安谿兩相國薦史傳
以爲特賜進士出身改庶吉士此譜則云捷南宮殿試

名在二甲第二引見改庶吉士均此譜爲是不特如跋
云讀公集者之一助矣癸丑五月吳興劉承幹跋

年譜補遺

春在里中

在癸亥三十四條
夏游吳門前一行

集朱竹垞寓齋先生嘗隨外舅陸射山先生集竹垞寓

齋竹垞詩有爾汝何甥謝舅飛揚季虎頭龍之句

在甲子三

十五秋聞下
第前別一條

三月晦日飲朱竹垞先生槐樹斜街新寓先生同梁藥

亭吳震方作詩云槐街舊與一峰鄰酒甕重開為洗塵

最喜今年春帶閨遲來又作看花人兩株桃樹手親移

紅影紛紛落酒卮特與幽庭添曲折秣稽棧綫縛笆籬

古藤枝下三閒屋爛醉狂吟又一時惆悵古人重會飲

小箋傳看洛中詩

原注見竹垞年譜
在乙巳四十復入都後別一條

正月二日

賜砥山綠石硯有賦

在甲申五十五條奉旨分輯佩文韻府前

正月先生壻李暘谷暄卒有墓志見文集又有哭李壻

暘谷詩見漫興集

在庚子七十一第一條

他山先生年譜刻既竣有持鈔本假余者取以檢

校前後志狀跋文俱從盍闕刻本撰人外曾孫陳

敬璋鈔誤作彌孫固不如此本之善其中曾祖母

寄示之曰曰當作句主飲食之時主當作至舟車

之費之當作乏外如戊申年夏四月二十二日長

子克建生字用民號求斐依全書通例當列正文

不應附作小注是鈔本之勝於此本者春在里中

數條此本脫漏今錄如右並附於後黃復翁云書

必置有重本又云得一本則校之往往獲好處斯
言豈不信哉陳敬璋字奉峩海寧人諸生母他山
先生之姪孫女嫻詩書教奉峩有法度奉峩亦能
得母歡嘗爲耕養圖以寄意自爲之記吳兔牀序
言此譜於先生出處事跡信而有徵無少文飾可
爲讀敬業詩者之一助蓋於奉峩深有嘉云劉承
幹再跋

季

替

屢

纒

鞅

吳興鏘氏
嘉業堂琴

厲樊榭先生年譜

嘉業堂叢書

仁和朱文藻撰

江陰繆荃孫重訂

康熙三十一年壬申年一歲

是年五月初二日辰時先生生

先生名鶚字太鴻又字雄飛先世本慈谿故仍以

四明山樊榭名其居學者稱樊榭先生

劉樊窗櫺兼取皮日

休詩

按集中載吳鳳華壽樊榭先生六十詩云先生

閻史辰五月莫吐二

高祖恭曾祖子良祖大俊父奇才均布衣前母孫氏

母何氏兄士泰弟鵠

見後

康熙三十二年癸酉年二歲

康熙三十三年甲戌年三歲

康熙三十四年乙亥年四歲

康熙三十五年丙子年五歲

康熙三十六年丁丑年六歲

康熙三十七年戊寅年七歲

康熙三十八年己卯年八歲

康熙三十九年庚辰年九歲

康熙四十年辛巳年十歲

康熙四十一年壬午年十一歲

康熙四十二年癸未年十二歲

康熙四十三年甲申年十三歲

康熙四十四年乙酉年十四歲

三弟生名鵠字子山

康熙四十五年丙戌年十五歲

康熙四十六年丁亥年十六歲

康熙四十七年戊子年十七歲

康熙四十八年己丑年十八歲

康熙四十九年庚寅年十九歲

先生丁父憂

按題三弟遺詩後序云予少孤露弟僅六齡至
今凡二十一年計之當在是年

康熙五十年辛卯年二十歲

按杭可庵先生遺象記云猶憶鶚弱冠時從先

生游堇浦小於鶚四歲先生命其少子號奕聞

世瑞

執經於鶚而堇浦亦時相過從未知何年姑附於此

康熙五十一年壬辰年二十一歲

康熙五十二年癸巳年二十二歲

先生爲錢唐王賓遠

路清

撰疏寮集序略云近余

道駕湖過虎丘臨惠泉往返於荆谿錫山之間遇
一勝境則必鼓棹而登足之所涉必寓諸日目之
所覩必識諸心自謂此行也詩可盈篋矣迨歸檢
其藁僅得八首而其抑鬱憤懣欲吐而不得吐者

填塞胸臆間幾不復支靜求其故終不可得蓋余
擔囊作客所聞者什一之籌所接者會計之策卽
遇佳山水少滌襟懷而塵垢復垢絕無文人翰士
可角勝於筆墨之場故每一搦管旋復自棄遊雖
多而詩則少

按此序末題甲午天中剛半書於秋稼軒之南
楹序稱近遊鴛湖虎丘惠泉荆溪錫山諸處又
稱所聞者什一之籌所接者會計之策今按甲
午年館於汪氏聽雨樓則無暇遊歷故以此序
系於癸巳年所云得詩八首集中不存疏寮集
是鈔本今藏瓶花齋吳氏此序墨蹟在卷首

季夏撰游仙詩三卷并序

康熙五十三年甲午年二十三歲

樊榭山房集編詩始於是年

夏與金壽門農汪次顏□□訂交

秋遊西谿

是年館於汪氏聽雨樓浦沈兄弟從遊

汪沆撰樊榭山房文集序云康熙甲午至戊戌先生授經子家聽雨樓兄浦偕沆朝夕承提命

康熙五十四年乙未年二十四歲

是年館聽雨樓

有文字之會

周穆門无悔齋詩集序乙未丙申間予輩數人爲
文字之會暇卽相與賦詩爲樂

送梅耦長先生

庚

罷秦順令還宛陵有詩

康熙五十五年丙申年二十五歲

是年館聽兩樓

倪穉疇

國璉

金江聲

志章

來訪不值穉疇爲作城東

訪友圖

婚於蔣氏

蔣靜山詩集序歲丙申予昏于蔣氏先生爲予妻
之世父

爲金壽門撰丙申集序

康熙五十六年丁酉年二十六歲

是年館聽雨樓

三月十三日遊法華山有詩

康熙五十七年戊戌年二十七歲

夏同金壽門訪長興鮑西岡明府鈔留宿縣齋和明

府蘋州曲十首又同壽門游若谿廣惠寺

五月十八日汎舟碧浪湖作夢芙蓉詞云何處簾紋
卷上白紵歌輕去也終怊悵雙髻可買應作五湖長
是年館聽雨樓

按汪沆序有甲午至戊戌授經聽雨樓之文則
是年尚館汪氏也

康熙五十八年己亥年二十八歲

三月同汪青渠汪抱樸游惠山 同程友聲紅橋夜
汎游蕃釐觀登平山堂

十一月自西谿汎舟之餘杭游洞霄宮

康熙五十九年庚子年二十九歲

秋應試舉於鄉以詩經中式九十一名考官李紱巨
來江西臨川人侍講學士副湯之旭孟升睢州人編
修同考官張□□梁友□□人永康縣知縣解元邵
基鄞縣人

全祖望撰墓碣銘云李穆堂閣學主試事闈中見
其謝表而異之曰是必詩人也因錄之

至慈谿展大父墓

登舟北上除夕宿德州

是歲符聖幾

之恆從游

康熙六十年辛丑年三十歲

春闈報罷隨南歸五月抵家

全祖望撰墓碣銘云計車北上湯西崖侍郎大賞
其詩會報罷侍郎遣人致意欲授館焉樊榭襍被
潛出京翌日侍郎迎之已去矣

夏久旱西湖水涸

汪惟憲積山遺集過湖上詩云岸柳汀荷漸槁黃
湖南蕪塞更荒涼可憐西子秋容悴僅作徐妃半

面妝

秋遊永康縣留房師張梁友署中

集中有將返武林留別張梁友先生詩云十日琴堂住天涼抱病歸偶游嗤索米臨別感傳衣是知張梁友為房師也

是年冬撰南宋院畫錄八卷自序

康熙六十一年壬寅年三十一歲

輯秋林琴雅徐紫山逢吉陳玉几撰吳尺鳧焯符幼

魯曾趙意林信題詞

雍正元年癸卯年三十二歲

金壽門農以詩卷索序

同沈欒城

嘉轍

吳耕民游艮山讀元大德土神廟碑

雍正二年甲辰年三十三歲

二月重游洞霄宮探大滌洞天

夏登舟北上

甲辰六月八日將北游張東扶符聖幾餞于湖上因
作念奴嬌詞志別

寄內詩云炎風記上郭門船回首高城更黯然

秋風潮損稼

寄內詩云夢回竹月攤書地人道風潮損稼天行
卷賃居成左計心關桂玉路三千

九月南歸

雍正三年乙巳年三十四歲

春客揚州二月四日汪祓江招飲康山同集者吳尺
鳧陳授衣各賦琵琶仙詞一闕

三月六日飲於陳松門七芙蓉閣會者里中友江硯
南

仲夏歸里集中夏五閒居詩云始春游廣陵仲夏返
傲廬

雍正四年丙午年三十五歲

春正月游揚州卽歸

按丁敬身硯林集有丙午正月樊榭自揚州回
攜示汪祓江拓贈厭勝錢詩

又客吳淞夏歸

五月二日生日有感作詩

五月十八夜偷兒涉水入室家具頓空

雍正五年丁未年三十六歲

正月晦日客湖州同姚玉裁

念慈

游道場山

初夏游姑蘇諸勝

五月二十五日梅雨初霽吳尺鳧買舟約數人緣孤
山掠蘇堤入西泠橋以泊於裏湖時趙意林鼓琴丁
敬身作小篆數幅沈欒城觴碧筩勸客先生與尺鳧
各賦水龍吟一闋極暮乃罷去

雍正六年戊申年三十七歲

五月移居

移居詩云半宅從人典全家冒雨遷又云差喜東城近蕭疏野趣便

十月弟子山舉一男未幾而殞

賦詩云含飴未得娛大母吟苦何緣學二郎落落衰門慳雀賀迢迢貧境想熊祥

按先生未有子故賦詩云云

輯城東雜記二卷自序

雍正七年己酉年三十八歲

人日爲吳繡谷作玲瓏簾詞序

春客揚州秋歸

九月一日爲母六十壽

母壽日作詩云酉年季秋朔阿母甲子周良朋惠
文綺學子羅嘉羞貧家不解音亦召絲竹謳

冬復客揚州歲暮歸

作友林乙藁跋

撰湖船錄一卷全謝山祖望馬曰璐姚世鈺序

雍正八年庚戌年三十九歲

夏客揚州旋歸

秋登虎阜 遊惠山 復客揚州同馬秋玉佩兮汪

西顯陳江皋自京口放船至焦山又游金山

冬歸

是年弟子山舉一子黼

雍正九年辛亥年四十歲

九月十日同嶰谷兄弟游眞州吳氏園

辛亥九月十日同厲樊榭陳對鷗汪祓江家兄嶰
谷遊眞州吳氏園亭用庾子山梨紅大谷晚桂白
小山秋平字爲韻

馬曰璐

清遊續佳節幽興在園池江近澄波碧鷗閒片席
遲人情猶戀菊霜意正摧梨獨有探奇者飄蕭似
不知

日高林翳散宛轉細脰通漫水魚梁北空亭蓮葉
東及時杯重把後日約難同賸取殘雲在芙蓉護

冷紅

疇平皆可望樹好更須攀選勝不無意分題先解
顏歸禽明落日眾葉響空山難得朋樽合都成如
此閒

寸寸碧瀾秋寒蟾共一樓茶聲分客聽竹色夾煙
流興異剡谿盡禊同蘭渚修明年春及健合買五
湖舟

十月十日三弟子山亡

題三弟遺詩後序云予少孤露弟僅六齡零丁危
苦相依至今凡二十一年今年十月十日忽遭疾
夭亡檢篋中有庚戌除夕一絕句弟素不能詩豈

有夙慧邪

春少司農鳳臺王公鈞爲兩浙運使時聘修西湖志時總裁爲總督李衛管理巡撫程元章總纂爲編修傅王露分修則與蘇滋恢杭世駿陸秩沈德潛吳焯趙信吳嗣廣張雲錦陳臻同在局

雍正十年壬子年四十一歲

移居南湖遂自號南湖花隱

按己未贈東扶移居詩題云移居南湖八年矣計之當遷於是年

王茨檐南湖花隱記云倚城北陴隔舍喧而卽靜水樹明瑟有敞而堂有折而廡有華散生盤門藩

落而延接于櫺檻是爲樊榭山民南湖花隱宋張
鉉功甫所稱管領風月者功甫以循王諸孫性豪
侈務奇意相勝其第宅不一區卽南湖所占在當
日不知幾百畝樊榭以數椽棲託於後其寂寞爲
已甚則樊榭之歉於功甫者也然樊榭學博而文
富所述造泓涵演迤不下數百卷識者謂其必傳
於後無惑功甫稱詩家上將冰茹雪食瑀碎月魄
雖見推于誠齋楊氏而遺集鮮傳則又功甫之所
遜于樊榭者也君子之游于世有裁足之思無贏
餘之念況出吾之所有不難拔古人而上之俛仰
吟笑綽有餘裕區區居室奚足較其豐約爲且夫

南湖當功甫之盛閭春把菊天鏡鷗汎月諸勝累
累無閒壤一時朱黻長纓賓從之填擁鐘鼉笙絲
磬筑之衍宴魚龍爵馬之殫物窮麗誠無所不足
迨其後不數十年淪宇蕤音並就熏歇今茲所見
遠巒雲浮卉木翳替禪棲孟瓶之扣食泠泠水次
物不停固與爲豪侈者之役于物也其終不如寂
寞者之適已矣題以花隱樊榭殆欲佩蘭餐菊以
終老於斯夫是爲記

郭頻伽靈芬館詩話云樊榭徵君舊居南湖白號
南湖花隱倪米樓秀才繪花隱樓圖偕李西齋布
衣同作齊天樂詞以紀之戴金谿比部賦南浦一

闕云鷗外夢長閒向湖邊又展露渦風鬢亭角舊
聽鷺楊枝曲消盡粉團香陣涼波無恙畫闌幾照
驚鴻影城上青山如解意點綴玉真眉暈天涯有
客悲秋喚停杯共說老仙花隱隱語笑芙蓉茶煙
杪未歇水樓芳訊斜陽一舸俊游客容易成孤引
霜葉無多明豔別似惜飄零紅粉

客揚州歲暮歸訪趙功千於松江

冬至後三日過馬半槎南齋炙甜香以供客風味
幽絕前明宣宗時禁中製也賦國香慢詞一闕明
日以綠箋書之裝成小軸高西唐篆其首曰甜香

新詞

游法雲寺賦銀杏詩

雍正十一年癸丑年四十二歲

春日晤沈椒園

廷芳

以朱性父珊瑚木難見賦

至虎丘 重午客淮南

秋客揚州歲暮歸 見陸南香口白蕉詞作序

九月九日在揚州 作沈椒園詩序

四月十一日奉

上諭舉博學鴻詞科除現任翰詹官員無庸再應薦舉外其他已仕未仕之人在京著滿漢三品以上在外著督撫會同學政悉心體訪遴選考驗保題送部轉交內閣

除夕撰一角編序

雍正十二年甲寅年四十三歲

正月九日與王茨檐

曾祥

丁敬身敬

汪西灝

沆

同游

皋亭靜慧寺

春客揚州

夏病疴

秋八月游西湖四照亭有記

九月總督上蔡程公合試全浙之士題有河清海晏

頌

按文集有河清海晏頌一首當是赴試時所作

復客揚州

揚州新構梅花書院爲馬秋玉賦紀事詩二十韻
詩集小玲瓏山館月夜答方將見懷有寒鐙背
旅雁霜氣皓盈襟云云則客揚州在秋冬之交
殆是試後事也

冬歸

是歲西湖志告成

時鄞縣全紹衣

祖望

留京師除夕夢杭大宗及先生

兩人抵京歡然道故有詩紀其事

据詞科掌錄是年九月初十日正試十四日補試
十三年正月十九日續試先生正試取第二名題
爲河清海晏頌萬寶告成賦三通論沖融和氣洽

五排十二韻

雍正十三年乙卯年四十四歲

二月二十七日奉

上諭薦舉博學鴻詞外省奏薦者寥寥無幾無論已奏未奏之省再行遴選

春客吳興月河

夏閏四月集竹墩積照堂同聯句者沈輪翁樹本杭

大宗世駿沈東甫炳震繹旃炳巽幼牧炳謙

按嚴遂成有同年厲樊榭孝廉納姬詩云牡丹

紅淺青梅小未覺尋春四月遲注云姬湖人孝

廉于四月來遊定情

七月爲杭堇浦作石經考異序

中秋夕迎姬人朱氏於碧浪湖白岳山人程士槭爲
作碧湖雙槩圖

悼亡姬詩序云姬人朱氏烏程人姿性明秀生十
有七年矣雍正乙卯予薄遊吳興竹谿沈徵士幼
牧爲予作緣以中秋之夕舟迎于碧浪湖口同載
而歸予取淨名居士女字曰月上

按集中有中秋月夜吳興城南鮑氏谿樓作詩
云言念嬋媛子牽蘿凝竝久納用沈郎錢笑沽
烏氏酒據此則朱姬迎於碧浪湖而相待于鮑
氏谿樓也

魏玉璜碧湖雙槩圖云厲樊榭徵君姬人朱滿娘
以中秋夜同泛碧浪湖而歸因繪是圖時賢相與
爲詩卒後余始獲見之用題其後夢覺揚州已十
年卻從茗水載嬋娟菰城若比松陵路又覺吹簫
白石仙星漢橫斜水拍天碧湖涼露卸紅蓮中秋
月色無窮好卻爲伊人分外圓翠袖熏鑪伴詠詩
春風小閣畫蛾眉誰令誤竊姮娥藥不見宜男結
子時一段春愁化彩虹乍來還去恨恩恩桃花滿
地胭脂溼不待東風嫁小紅

許齋生云奚虛白

疑

居湖州城南舊爲鮑氏谿樓

卽樊榭徵君納姬人月上處也虛白摹遺像屬題

次圖中詩韻百年數文獻君名留人口彼姝適所
遭幸于如是柳樂府賽旗亭孰分袒左右俊遊豔
稱前佳話永垂後谿樓亦靈光終古闕戶牖天公
選替人圖畫要諸久近釣漁隱漁親酌酒奚酒家奚
釀酒稱酒奚 青山紅袖閒重置斲輪手光芒交映輝何
處蔽沫斗許我補題詩漫郎成聲叟

十一月初十日奉

上諭保舉博學鴻詞直省所舉人數寥寥務宜悉心延
訪速行保舉定於一年之內齊集京師

是年正月會同舉諸公於槐塘小眠齋宅共十一人
徵歌選勝極一時之盛

按齊召南賜硯堂詩答汪五槐塘津門見寄次
韻兼懷諸友三首其第二首云吳山顧曲記當
年纔落春燈未禁煙細雨溟濛留客夜微風料
峭養花天清歌共判樽前醉高會誰知夢裏緣
今日浮萍湖海闊如君還近潞河船原注云乙
卯正月會同舉諸公於槐塘宅共十一人今則
厲二樊樹沈六幼牧周大青瑤張大介石俱還
浙多時巖大崧占尙讀禮未出周五石帆得官
後卽以艱歸家每與堇浦星齋晤言不勝今昔
聚散之感

按先生集中此會無詩因附載齊詩於此

寒食日撰屠墟廟志

乾隆元年丙辰年四十五歲

二月二十四日奉

上諭內外臣工所舉博學鴻詞聞已有一百餘人祇因到京未齊不便卽行考試其赴考先至者未免旅食艱難著從三月爲始每人給銀四兩資其膏火在戶部按名給發考試後停止若有現任在京食俸者卽不必支給並行文外省令未到之人俱於九月以前到京若該省無續舉之人亦卽報部知之免致久待

是年七月應詞科與趙功干偕行徵入都報罷南歸

試日

欽命賦題五六天地之中合賦 詩題山雞舞鏡 論

題黃鐘爲萬事根本論

歲暮行荅蔣丈雪樵詩云我棲山澤久沈冥卻因
公府相料理邪癥爭笑伯龍癡漫浪翻成司馬悔
孫瑤圃行狀云乾隆丙辰北闈力薦不售自京歸
里學詩于厲樊榭先生醇古淡泊令人尋味於言
外

全祖望撰墓碣銘云以詞科薦同人強之始出穆
堂閣學欲爲道地又報罷

杭世駿詞科掌錄云

明詔旣下首訖凡四年合內外所舉凡二百六十七人

又云浙江總督管巡撫事兵部右侍郎兼都察院
右都御史程元章舉十八人庚子舉人厲鶚浙江
錢塘人與烏程嚴遂成仁和周玉章杭世駿歸安
沈炳謙天台齊召南鎮海張懋建會稽周長發錢
塘汪沆蕭山周琰山陰周大樞秀水萬光泰錢塘
陳士璠餘姚邵昂霄錢塘程川歸安孫詒秀水李
宗潮錢載同舉

秋作授衣賦

乾隆二年丁巳年四十六歲

夏客揚州重游焦山

游曲阿旋歸臥疾南湖草堂

秋復客揚州冬歸

擬冬堂贈辭序云乾隆丁巳夏五予抱嗽上氣之疾歷秋乃瘳家人以爲有妖沴焉歲除前四日命巫歌樂牲醴送之

乾隆三年戊午年四十七歲

春客揚州

九月門人符南竹卒

揚州勝處惟紅橋爲最十月十七日風日清美煦然如春廉風萸亭賓谷封田招同授衣于湘喚舟出鎮淮門歷諸家園館延緣至法海寺極蘆灣盡處而止縣鐙歸櫂吟興各不能已相約賦念奴嬌

鬲指聲一闕

乾隆四年己未年四十八歲

三月編定樊榭山房集詩八卷詞二卷序而刊之

自序云僕少好篇詠晚頗知難三十年以來所作
隨手棄斥存篋中者僅十之二三暇日編次古今
體詩爲八卷長短句二卷乾隆四年三月朔

五月渡太湖至吳江旋歸

六月六日爲符南竹作秋聲館吟藁序

樊榭山館續集編詩始於是年九月

按前集自序雖在是年三月朔而所編詩乃盡
于七月以後續集開卷首翻有九日登高不果

之作故編詩始于九日

賃居南湖上八年矣其主將鬻他氏復謀棲止瑞石山下有屋數楹張東扶導以相度頗愛其林壑之趣以價貴未遂

乾隆五年庚申年四十九歲

春正月同麇徵敦復西顛游西谿遇雪

初夏移居東城 有小園見辛酉三月五日偶成詩

移居詩云南湖結隱八年餘又向東城賦卜居又云麋公祠宇今相並且逐鄰翁掠社錢自注云里有古社祀蜀漢糜公子仲

按先生移居詩有驗時巢燕方新乳句知移居

當在初夏

夏五客揚州旋歸 與吳江王載揚藻唱和

冬集小山堂食熊掌

乾隆六年辛酉年五十歲

春正同西林皋亭探梅

夏日臥疾

歲暮姬人朱氏病甚危

典衣詩云半爲閨人償藥券自注云時朱姬病甚危

乾隆七年壬戌年五十一歲

正月三日姬人朱氏歿湖上權厝

悼亡姬十二首序云姬人鍼管之外喜近筆硯影
搨書格略有楷法從子授唐人絕句二百餘首背
誦皆上口頗識其意每當幽憂無俚命姬人緩聲
循誦未嘗不如吹竹彈絲之悅耳也予素善病姬
人事予甚謹辛酉初秋忽嬰危疾爲庸醫所誤沈
綿半載至壬戌正月三日泊然而化年僅二十有
四竟無子

午節貧甚桑弼甫冒雨假以白金十兩

是年輯遼史拾遺方成

趙昱觀廣政石經殘本用昌黎石鼓歌韻詩更復
攜示史拾遺數番略盡松間哦自序注云時先生

輯遼史拾遺方成

在揚州納姬人劉氏

馬秋玉 曰瑄詩

竹西自昔多佳麗名士傾城此一時聞說蛛絲曾

拂面便看椒實已盈枝 窗外有連蒂椒一株湖邊緩唱迎郎

曲橋畔先歌卻扇詞雙燭影中杯漱灑寒宵真與

意相宜

畫取雙眉當遠嵐隔牆詩老漫相探 謂謝山幽姿的

的如瓊玉皓月盈盈正十三顧氏瑤池工點筆蘇

家小袖最宜男國香一覺徵前夢近事南堂喜劇

談 南堂納麗揚州歸與舊姬連育四子

趙意林寄調厲樊榭納姬揚州云歌吹殘年憶竹
西歡情已作絮沾泥泰孃才思知多少蓼岸桃溪
試品題姬人姓劉雪凝柔玉滿邦溝花蕊新詞乞小留
想得定情鴛帳暖莫教月上夜生愁

按沙河逸老小藁系於壬戌是月上歿後卽納
劉姬堇浦作秋玉墓志所云樊榭六十無子是
五十之訛窗外有連蒂椒是揚州事朱朗齋疑
在南湖疑在谿樓是未細看沙河逸老藁也

乾隆八年癸亥年五十二歲

春日病足

三月十六日爲汪西顥沈作盤西紀遊集序

客揚州同人招集花畦看芍藥

病肺

同人攜茗集張漁川齋中試惠山泉用涪翁韻詩
云嗟予微疾不能飲湖目但思蓮子湖自注云予
以病戒茗煎蓮子代之

齒痛

詩云五十又過二早衰惜居諸世味已飽諳長此

安齟齬

秋復客揚州

同方西疇士庭

閔玉井華

陸淳川鍾

輝王梅泚藻

遊金陵攝山詩有攝山紀游集一卷陳

授衣章序

九月馬半槎招集行庵以仇英畫淵明像爲供用人

世難逢開口笑菊花誰插滿頭歸分韻賦詩

作九日行庵文讌圖記

乾隆九年甲子年五十三歲

春客揚州

秋過硤石登西山廣福院 月夜渡石湖

輯雲林寺志八卷自序

乾隆十年乙丑年五十四歲

春過毘陵游青山莊 客揚州

秋八月遊越中

題北嶺將軍廟詩序云予以乾隆乙丑秋八月同

新安吳長公同里丁敬身爲越中之遊過謁廟下
九月復客揚州

重九後二日樊榭至自武林同人適有看菊之集
分韻其賦得侵韻

馬曰琯

景幽風淡晝愔愔簾卷秋齋雨一襟滿眼繁英尙
初馥入脣香蟻少孤斟故人適白湖山至雅調重
聯斷續吟不是此花無此會花枝人意總同岑

分得佳韻

馬曰璐

菊葉盈枝香霧排陶家清興繞書齋秋花愛寄蕭
閒地好友能開寂寞懷三徑雨風寧少負一年琴
酒不教乖峭帆纔落吟情續又比皋亭句子佳

樊榭

周詩
來時有過舉
亭臨平諸詠

冬夜同樊榭堇浦竹町西疇玉井南圻于湘家兄
嶰谷宿南莊

梅花一枝橫碧沼似爲荒村破枯槁詩人衫袖有
春風淡月窺人況林表牀鋪丁字聯清冬四圍水
木霏微中地白時看雁影過窗虛更覺江天空獨
我吟聲何太苦月色花光互吞吐詩成遙答遠山
鐘夜靜不傳街市鼓人生會合安可常趁取酒熟
清而香明朝更放煙江棹水宿雲眠枯木堂
邀樊榭竹汀于湘看牡丹酒半移醉繡毬花下作
鐙轉闌干月轉空花殘猶得貯春風不因被酒還

移席孤負故人今夕同

東樊榭竹間紅橋之遊

閑遊最好晏温天綠樹陰濃靜管絃想見吟聲出

篷背沙禽飛過筆牀前

紅橋煙水幾多寬擬作西湖一角看我欲明朝相

約去夕陽同倚曲闌干

乾隆十一年丙寅年五十五歲

春閏三月三日杭州府鄂筠亭敏修禊事於西湖賦

詩會者凡六十一人樊榭與焉

同會者錢塘梁谿父文濂周穆門京金江聲志章

金冬心農厲樊榭鶚丁龍泓敬張柳漁湄陳句山

兆崙 陳眉山 兆嶠 呂耜堂 伊 吳鷗亭 城 施竹田 安

陸抑齋 秋 吳藍田 玉增 施北亭 庭樞 周暢鶴 宸望

丁誠叔 健 吳奐若 璠增 施大醇 學濂 吳蘭林 玉墀

厲繡周 志黼 仁和許初觀 大綸 孫晴湖 陳典 胡質

孚 旒 汪復園 臺 梁葭林 啟心 顧耕欄 正謙 杭堇浦

世駿 王茨檐 曾祥 顧寸田 之麟 張南漪 燿 皇甫藥

坡 鯢 孫瑤圃 庭蘭 杭奕聞 世瑞 趙勿藥 一清 吳萬

洲 中麟 歸安茅湘客 應奎 孫武水 林 慈谿周雪崖

羽達 會稽魯秋膝 曾煜 平湖陸恬浦 培 張鐵珊 雲

錦 葉迎坡 鑿 陸雲軒 騰 海寧施蘭垞 謙 許復齋 承

祖 鄞全謝山 祖望 秀水錢捧石 載 德清徐南墅 以

震 徐柳樊 以泰 徐根苑 以坤 衲子則茨虛明中讓

山簪玉其非浙產者南陵劉迴舍 琦 歛汪秀峯 啟

宣城施檠齋 念曾 滿洲舒雲亭 瞻 長沙周雪舫

宣猷 閩林餘齋 緒光 及筠亭太守也太守彙刊其

詩而明中為之圖穆門為之序

夏客德清縣齋歸遊臨平諸勝

冬為銷寒會會者周京金志章梁啟心丁敬杭世駿

全祖望顧之麟吳城丁健汪啟淑

全祖望撰墓碣銘曰予交樊榭三十年禡門馬嶰

谷兄弟延樊榭於館子每數年必過之嶰谷詩社

以樊榭為職志連牀刻燭未嘗不相唱和已而錢

唐詩
塘踵爲詩社子亦豫焉

歲暮游弄珠樓

輯宋詩紀事一百卷

乾隆十二年丁卯年五十六歲

春客當湖

夏客揚州五月十五日小玲瓏山館爲展重午之會

秋歸復同全謝山偕往揚州至吳門疾作遽歸

月夜唐棲舟中次樊榭韻

全祖望

霜花霜葉環江城夜明如晝送我行生民水旱大

可念故人出處尤關情

時樊榭將謁選予力止之未得

三千卷書

壓艙重五十里水聽櫓清東方漸白殘夢醒荒雞

似爲客子迎

溪行欲與樊榭遊烏鎮東西二寺不果

緩棹出烏鎮遙山入望稀清流染晴色稚麥幻春
暉河女留魚賤僧寮訪古違五湖堪極目浩蕩白
鷗飛

吳江過接待寺和樊榭

拂天喬木古有客訪三乘帶霧過枯澗叩門多遠
僧鷗分午餘飯雲護宋時鐙此去臞庵近居人識
未曾

乾隆十三年戊辰年五十七歲

春暮由水路入都 抵津門客查蓮坡之水西莊同

厚誥
撰絕妙好詞箋七卷遂不就選而歸 嶧縣待闈

晤沈椒園時以御史催振至山東 南地拜杜少

陵祠

全祖望撰墓碣銘云樊榭且老矣乃忽有宦情會
選部之期近遂赴之同人皆謂君非有簿書之才
何孟浪試一擲樊榭曰吾思以薄祿養母也然樊
榭竟至津門興盡而返

冬日重遊大滌洞天

復返揚州

同堇浦竹町西疇玉井南圻于湘宿嶧谷南莊

重遊焦山

按焦山爲廣陵馬嶰谷半查招遊嶰谷詩焦山
看月以江流有聲斷岸千尺山高月小水落石
出分韻則是十六人同遊又按登雙峰閣詩以
清磬度山翠閒雲來竹房分韻則是十人同遊
矣又按寒夜石壁庵同聯句者馬曰瑄方士廔
馬曰璐杭世駿陳章陸鍾輝樓錄及先生凡八
人則又是八人同遊矣

歲除日同金江聲吳東壁甌亭游紫陽庵賦詩自注
云南史何子季云吾年五十有七月食四斗米不盡
何容復有宦情予年正與之同也

梁啟心南香草堂集喜樊榭自津門歸詩云一官

如脫屣片席似鷗輕小別轉成趣清遊肯近名西
風葛沾水寒食呂彭城興盡歸來好詩壇待主盟
自注云樊榭本以謁選入都至津門忽不樂卽日
買舟歸里

乾隆十四年己巳年五十八歲

春客揚州 舟過橫里訪平松雨故居

過蘇州訪王述菴昶於朱氏蘋花水閣

秋哭查蓮坡

九月一日爲母八十壽堇浦撰序

乾隆十五年庚午年五十九歲

初夏客揚州

乾隆十六年辛未年六十歲

是年編定樊榭山房續集序而刊之

自序云僕詩前集自甲午至己未凡二十六年僅
編成八卷詞二卷附焉己未至今辛未十二年來
復次第成續集如前之數

春三月

皇上南巡偕吳城撰迎鑾新曲城曲曰羣仙祝壽先生
曲曰百靈效順合刻爲一編

仲春撰煙草倡和詩序

初夏客揚州 大旱米貴 遣劉姬

杭世駿撰馬君懈谷墓志銘云錢塘厲徵君五十

無子借君宅以蓄華妍者謂納一妾也杭又有哭
厲徵君詩云服散幾年疏酒伴分香先日放歌姬
則先生將歿前妾已先遣去矣

按先生以求子故累買妾而卒不育最後納妾
劉姬揚州人頗昵之以不安其室而去見全墓
碣銘

冬復客揚州

辛未仲冬樊榭至自錢湖謝山至自甬上雨中招
集山館有懷家兄嶰谷暨于湘北上 馬曰璐

一庭寒影暮雲閑時見飛鴻杳靄間詞客喜從江
外至音書猶未汶陽還長途並轡逢朝雨孤館分

鐙話故山何事翻云成悵望從來會合感離顏

乾隆十七年壬申年六十一歲

元日姪黼生子

是年九月十一日辰時卒無子母太夫人猶在堂也

哭樊榭

馬曰琯

涼雨孤篷憶去時無端老淚落深卮年年送慣南
湖客腸斷秋衾抱月詩

卅載交情臭味親甄鑪木榻媿留賓丹鉛不斷杯

孟斷君素不飲酒
近復毀茶風雨清吟泣鬼神

一第那能博母歡夕葵負米恨漫漫泉臺縱隔無
多路忍見慈闈淚眼乾

無兒栽竹句堪哀無兒北字猶栽竹君句也此事才人莫怨來

天遣多才例磨折幾曾文字委蒼苔

藥補清羸鬢已華一生心跡許煙霞松聲月影休

重問無限寒蟲助怨嗟

曲曲長廊冷夕曛更無人與其論文宵分有夢頻

逢我海內何人不哭君

年來吟社半凋零胡後唐前失典型寒鑑樓空小

師死招魂又復酌寒廳復翁天門慧田環山次第下世

雪薦哀黎霜薦柑清冬彷彿會城南紙蓮花動風

吹戶老木蕭蕭葉打庵聞訃後為位哭於行庵

哭樊榭

馬曰璐

大雅今誰續哀鴻亦叫羣情深攜庾信義重哭劉

蕢望遠無來轍呼天有斷雲那堪聞笛後又作死

生分社友凋喪及
樊榭而五

冷泉流不盡游跡憶前經一舸載春雨卅年成聚

萍史收遼散佚詩紀宋英靈樊榭有所輯遼史
補遺及宋詩紀事寂

寞叢書畔高樓剩墜螢

握手看徂謝詞場失總持秋鐙弔影瘦明月照情

癡樊榭惆悵詩有秋衾空抱月明歸
之句遂成絕筆秋鐙詞別時同作集在無兒守

魂歸戀母慈絕絃予白首仍是歲寒期

骨相由來異科名不救貧授書寧負笈化鶴定朝

真聞其墮地時即有異
未就外傳已能屬文似此堪千古如君復幾人

重爲吾道惜四海一沾巾

按是年不聞先生有至揚州之事据盧見曾刻
漁洋山人感舊集序是壬申六月撰序云辛未
冬以公役至京師謁崑圃黃夫子於家出所鈔
漁洋先生感舊集見示拜受而卒讀之云云又
凡例一條云是集轉輾鈔寫訛誤頗多宋編修
嘗訂正之復委榆邨之孫棠全子謙以校讐之
役再三過尙有闕疑玲瓏山館藏書充棟所與
稽者厲樊榭鶚陳授衣章皆博雅君子幸重檢
閱而後授梓云云

蓋感舊集得於辛未之冬而開雕於壬申之夏

則是先生於辛壬冬春之間尙留揚州也

嘉慶六年辛酉歲得先生及側室朱孺人栗主時
何春渚^琪方倡率同人葺新武林門外衙灣吳家

橋蘇家廟以祀宋黃文節公遂於祠右建清風閣
以祀先生栗主爲丁龍泓^敬手題其內陷云樊榭

先生行二生康熙壬申年五月初二日辰時卒乾
隆壬申年九月十一日辰時副室朱氏孺人栗主
乃先生所自題云名曰滿娘字曰月上烏程人生
康熙己亥年八月二十四日辰時歿乾隆壬戌年
正月初三日戌時王蘭泉廉訪爲撰丈室花同天
女散摩圍詩共老人參以題其楹

全祖望撰墓碣銘云卒於某年月日享年六十有二娶某氏無子以弟之子爲後葬于湖上之某峰受業汪沆樊榭山房文集序云先生歿於乾隆壬申九月易簀前一日詔沆而語之曰予生平不諧于俗所爲文詩亦不諧于俗故不欲刻向不知我者而索序詩詞二集業已自序授梓尙留小文二冊藏敝篋子知我者也他日可爲序而存之今年春從先生嗣繡周茂才索得原藁付諸剞劂氏謹述先生一身淡于榮利難進易退而著述流傳宏通淹雅之譽播于海寓及沆從遊承訓之本末次第以紀其梗概之乾隆戊戌秋七月

按全氏不詳卒年月日但云享年六十有二汪
序則云歿于乾隆壬申九月是享年僅六十一
矣故并存以俟考定又据瑞石山房集哭厲先
生詩編於壬申則當從汪序也

借閒生詞云樊榭先生木主舊祔武林門外黃文
節公祠道光戊子正月二十一日同人移奉西谿

交蘆庵先生墓故在此譜白石法曲獻仙音調並

用原韻煙渺南湖草迷東墅欲爰吟魂何處先生自南

湖移居東城路逐谿迴寺依雲住騷壇舊日樽俎歎大

雅淪亡久輕鷗自來去漫相顧薦寒泉萬梅花裏

天女伴隨手散空飛舞先生姬人朱月上木主亦附祀焉定月下

徜徉記前游微笑心許窈窕幽棲悅披尋集內妙
句待荒阡澆酒莫又清明時雨

張仲甫彝壽軒詩鈔云章次白奉厲徵君神位於

永興寺陪祀馮具區先生酌以詩余亦繼聲兩賢

慧業並生天蕭寺棲神豈偶然遺老倡開招隱社

徵君賡和太平年梅花詩卷俱千古流水高山共

一椽二雪雙龕相映處便娟空翠稱幽眠按此詩作於道

光甲辰是又設位於永興寺也
寺在西谿徵君嘗游憩焉

俞蔭甫春在堂隨筆云厲樊榭徵君墓在西谿法

華山之王家鳴因奉栗主於交蘆庵事詳吳穀人

祭酒樊榭徵君墓田碑記道光庚寅戴文節公徐

汪兩君至庵祀徵君歸而寫爲長卷山水縈紆蘿
蔦幽蔚樊榭詩所謂一曲谿流一曲煙者盡此尺
幅中矣舊藏章次白廣文梅竹山房亂後失去丁
君松生又購得之因付交蘆庵僧收藏以存古蹟
時交蘆庵亦因亂後傾圮如冠九觀察出貲修葺
并屬何子貞先生書徵君及月上姬人栗主仍奉
庵中今又得文節此卷名流韻事後先輝映足爲
西谿生色矣松生以示余故紀其略也

諸遲鞠谿樓延月補圖題記云聖湖之陰西谿之
奧勝地幽刹曰交蘆庵庵有谿樓延月圖寫厲徵
君納姬事雍正乙卯樊榭重客茗谿鮑氏谿樓實

爲寓屋滿孃月上納於中秋碧浪同舟瑤情玉色
未傳圖詠久頗闕焉逮嘉道閒涑園太守訪椒墓
於前小米年丈獲栗主於後祀之庵院永伴瓣香會
費山人丹旭安硯東軒曾寫兩圖一畀庵僧媵藏
勿替其副贈奚處士疑谿樓後主相證墨緣當代
名流偕題雅製今具清尊集中庚辛之難庵燬於
賊此圖亦亡邇者舊宇新庀歲已十六年文從子
子用刺史棄官將歸屬補繪事更乞偶雲同年重
書題製合裝冊子仍付庵僧保守什襲斯蓋遠縣
佳話近繼先志舉一而善備矣子用復哀刻徵君
全集雖其唾餘都經手輯讀書讀畫煥然粲然吾

知海客金餅增價於樂天山門玉帶比珍於佛印
又不第蕭寺之清供抑亦藝苑之韻談歟故樂爲
補圖且拈黃鍾商琵琶仙慢一闕用白石道人吳
興紀遊詞韻記之時光緒十有一年乙酉小暑日
也詞曰倒影樓臺有人是打槳來時桃葉小名惟
認團欒黃昏最幽絕消受到吹簫石帚但春去怕
聞鷓鴣畫裏煙波定中香火情事誰說 謾分付
禪窟枯僧已風景都非那時節添了百年佳話儘
飛花飛莢憑點綴詞僊眉史補谿山絹素如雪正
好居士清涼倦遊言別

樊厲榭先生年譜

樊榭年譜刊行後費仲深太守遂以樊榭集注十六冊

相假吳江董先生汝熊所著詳於典故於樊榭事蹟亦

少有加增於年譜外者謹擇譜中未見姓名諸人表之

親戚有蔣賓侯宏道靜三之兄詩友汪青渠潭石貞石

丈吳穎芳西林顧之珽搢玉吳梅查均蔣敬持德亦諳

上緒涵香院僧太虛清一交蘆庵僧然房師張梁友陸

南香汪祓江三人仍未見其名也又有陳燧過滿月庵

尋樊榭先生舊游處詩東鄰有精舍蔽虧深樹裏矮屋

如蝸盤清涼國尺咫吾徒苦熱惱招攜隨步止初來意

已幽稍住趣尤美憶昔厲徵君讀書曾憩此文采映前

後風流被閭里杖履未及從吾生悲後起只餘壁上詩

一一勞僧指清游洵夙緣高談契禪旨啜茗坐超忽松
風浩盈耳

鮑亞谷禪勺載樊榭逸詩云予前宰長興厲孝廉

鶚

來訪貽詩一冊五言云相近餘杭道山川似永嘉樹

寒鳥挾子地煖薤生花碓舍水春急谿門網曬斜他

年如卜築便種故侯瓜

餘杭道中

故人新定去別我雨冥

冥湖海須強飯風塵尙轉萍秋山臨夕渡孤權指前

汀牢落無勞歎雲嵐何限青

送倪子珍睦州

水檻天然好

眞成漫叟居芙蓉三品鳥蒲葉一雙魚隱几時無事

焚香復晏如緇帷有漁父更憶漆園書

題楊山水閣

漢帝

祠南岳還封天柱山翠微終不改玉檢久應閑君住

皖公下青蒼對掩關鱸香秋盡後歸去聽潺湲

送人歸滯

山曉入曾城路蕭閑水木饒松涼人氣健殿迴露華

銷無復金輿駐依然絳節朝白頭逢道侶指點話光

堯登石通橋道當風上古臺山蟬吟不斷林翠拂還

來泉想虞琴奏蘿疑御幄開登臨思內禪浩劫使人

哀賸訝神山失蒼蒼片石存莓苔鐫古色風雨護雲

根遠貌飛來勢空歸眾妙門東京共蕭瑟莫問玉眞

軒

過宗陽宮是南宋德壽宮遺址

七言云林坡犖确如香篆湖色沿

洄似玦環瞥見郭熙小平遠斜皴粉墨寫寒山飢烏

接翅上觚稜一面青山塔七層塔院微鐘斷煙火耐

寒猶有赤髭僧

雪後寶石山

按藍新水拍湖隄側帽年年

路不迷盡日無人窺影處
蜜梅花發竊黃鵠

南湖雙
早春

鬢十五盪舟徐不見清波錦鯉書
儂似湖中石鼓樣

望郎望似蜀桐魚

臨平湖
竹枝

斧劈山色雪雲淡
不了樹

枝黃葉稀月波樓下吹笛去
絕無人影披蓑衣

朱璧
谿山

釣雪
圖

七古云平生最愛郭熙語
春山如笑心所耽秋

山如妝更佳絕境不親遇
思潭潭路紆港狹暗門外

兩岸樹老多楓枿秋聲萬竅發
篋瑟黃葉飛墜前林

龕陡出港口目盡豁湖面百頃
朝光含青山有意在

隔岸狀態始得窮幽探
馮夷苦欲獻窈窕風伯爲我

驅浮嵐穠花穉柳亦何有
朱粉已謝東家慚或浮亭

亭遠在北或立挺挺偏依南
陰晴重掩不可數一一

碧玉蓮花簪誰能水上見微步宓妃湘女遙相參坡
陀中更橫秀嶺首尾儻儻形眠蠶敲斜斷處遠岫出
眉際小缺微填藍石梁坐久劇平視口不能語心能
諳須臾殘日射滉漾金支彷彿蛟宮涵漁舫遠列若
鳧雁敗荷蕭索聲微酣似聞有語勸小住欲築汀畔
爲漁庵坐學士港小橋望隔湖諸山 蔣生沐東湖叢記云余收得
樊榭山房詩集爲萬近蓬藏本有丁敬身手書卷五
游龍興寺詩其眉上有云甲申臘月寺爲鄰火所燒
寸椽不留獨胡季良所書陀羅尼經幢巍然無恙城
中易黑灰此獨未摧拉竟成詩讖爲撫然者久之敬
身七十一歲記于萬秀才近蓬藏本時乙酉閏二月

二日也此幢予曾作長歌稿已失去去臘龍興寺被

災後予過之市井凋殘寺已盡燬維此幢無恙歎佛

力之彌堅喜古緣之不損因賦一律記之一火俄教

掃百椽地中三日尚浮煙寸空真歎人災烈幢在方

知佛力堅俗駕何曾諳擊埽韋蘇州石鼓詩既擊既埽黑白分貞材

枉自極雕鐫幾時客有如歐者下馬能來此布氈又

卷六明鄭貴妃書泥金普門品經同丁敬身作詩其

眉上有云予稿已燬去見此尚可記也因附錄之敬

身記比似楊家妹子書顏挑柳趯更憐渠米公云顏柳以挑趯

名家貴妃所書是學顏書頗腴勁可玩蒙將白馬馱經力已到紅羊換

劫餘敲冰覘紙帝青光蘸水皴毫苦末黃苦末梵語泥金也見

翻譯名義想見莊嚴書竟處開函猶拂內家香月墮雲飛

不可攀琳瑯金薤見來難祝釐有願纏繇在遺事分

明似阿環了無印跋流傳久鈿匣香厨味幾家綺語

莫教增障習好同天女散來花宋張端義貴耳集真定大厯寺藏經皆唐

宮人所書經尾署姓氏極可觀佛龕上有一塗金匣藏心經一幅字尤婉麗後題云善女人楊氏為大唐

皇帝三郎書敬叟附記七十一歲案此數詩兩家集中均

未載附識於此

六時西新儀也

三 變 節 節 十 一 節 先 生 著 書 節 節 節 節

八 節 不 變 節 節 節 節 節 節 節 節 節 節 節

東 漢 節 節 節 節 節 節 節 節 節 節 節 節 節

四 節 節 節 節 節 節 節 節 節 節 節 節 節 節

小 節 節 節 節 節 節 節 節 節 節 節 節 節 節

節 節 節 節 節 節 節 節 節 節 節 節 節 節 節

厲樊榭年譜一卷朱文藻朗齋撰樊榭先生錢塘人康熙庚子舉人會試屢報罷薦舉鴻博又不售卒年六十一無子太夫人猶在堂人皆慕其才而悲其遇朗齋仁和人於樊榭先生同里後輩此藁寥寥數葉蓋未成之作迺屬江陰繆藝風徵君詳攷之在公車徵士錄得其父母及兄之名氏於本集中得其完娶之年於南齋集沙河逸老集知納劉氏妾在揚州於馬秋玉諸君輓詩知歿時老親猶在補綴成帙聊可觀覽昔年曾聞全集注本在費芸舫中允延釐所今不知所在知此書復出必更有可補者樊榭所著之書遼史拾遺湖船錄刻於汪氏振綺堂朱畫苑錄刻於丁氏嘉惠堂詩文詞集汪

氏刻之并集外詩墓志輓詩之類頗爲詳備歲在旃蒙
單闕吳興劉承幹跋